

De terræmotu maximo.^a

CAP. XL.

Anno ab incarnatione Domini MCXLIII in Italia maximus fuit terræmotus, quo scisi sunt montes quam plurimi, diruta castra, et campanile Ecclesie Faventinæ [a] crepuit cum ipsa Ecclesia.

Quando iuvenes fuerunt capti apud castrum Castelloni seu Castri Leonis [A].

CAP. XLI.

Destructis castellis quam plurimis, et inimicis devictis, sæpiissime mala de novo pullulare Faventinis non desierunt, more Hydrae serpentis, cuius [b] uno inciso capite, monstra nascebantur [c] quamplurima. Videntes itaque Faventini cives Ravennæ et Forlivi in eorum odium pro posse Castillionum munire, quod infra paucos annos quasi cum quadam simplicitate [d] et sub specie recti de loco ad locum transtulerant; sub anno igitur nativitatis Domini MCXLIII iuvenes quidam, omnibus discretis et sapientibus eorum propositum nescientibus, in nocte conversionis Sancti Pauli ad prædictum equitaverunt castrum; quod cum totis viribus expugnassent, profecto, ut dicebatur, cepissent, si sagittari quidam, quos duxerant, magis prædæ quam prælio intenti, eos pro fide juvissent [e]. Dum hæc ita gerebantur, supervenerunt Livenses, qui plures quam quadraginta ex nostris ceperunt iuvenibus, quosdamque occiderunt, ceteris vulneratis et fortiter flagellatis vix evadentibus, re tam grandi frustra incepta.

De prima obsidione Castri Leonis seu Castillionis [f].

CAP. XLII.

Postquam Faventini iuvenes illos, qui supra vires rem arduam inconsulte et stulte inceperant, neque suis neque suorum precibus amicorum [g] recuperare quiverant,

[a] Ecclesie Faventinæ. Sic legit cl. Mitt., vel etiam Sanctae Mariae. In margine C. M., aliena manu additur: Sancti Petri. Codd. alii lacunam habent. — [b] cuius, C. M. et cl. Mitt. Alii Codd. habent cui. — [c] monstra nascebantur, C. M. In C. V., nova nascebantur. — [d] cum quadam simplicitate, C. M.; sub quadam etc. C. A.; in quadam etc. C. V. — [e] pro fide juvissent, C. V. Pro fide juvassent, C. M. — [f] Castri Leonis, seu Castillionis. Nota quomodo supra scriptum fuit, et quomodo aliter hic scribitur. Modo enim Castellioni, modo Castillioni, modo Castilloni habet C. M. — [g] precibus amicorum. Sic lego Codd. M. et V.; periculis amicorum, cl. Mitt. legit.

[A] Vulgo, Castel Leone. Locus est ad dexteram viae, qua ab urbe nostra itur Forolivium, septem hinc fere milliariis distans.